



SURUHANJAYA HAK ASASI MANUSIA MALAYSIA

HUMAN RIGHTS COMMISSION OF MALAYSIA

TINGKAT 11, MENARA TH PERDANA,
JALAN SULTAN ISMAIL,
50250 KUALA LUMPUR

Tel: 603-2612 5600

Fax: 603-2612 5620

Email: humanrights@suhakam.org.my

Web: www.suhakam.org.my

EDITOR, MEJA BERITA/RENCANA

SIARAN SEGERA

LAPORAN INKUIRI NASIONAL MENGENAI HAK TANAH ORANG ASAL/ASLI DI MALAYSIA

Suruhanjaya Hak Asasi Manusia Malaysia (SUHAKAM) pada hari ini dengan besar hati mengemukakan Laporan Inkuiri Nasional Mengenai Hak Tanah Orang Asal/Asli di Malaysia kepada pihak Kerajaan Malaysia dan awam.

Sepertimana yang umum sedia maklum, Inkuiri Nasional ini julung kali diadakan oleh SUHAKAM. SUHAKAM memutuskan untuk mengadakan Inkuiri Nasional ini setelah menerima banyak aduan secara berterusan berhubung isu tanah daripada masyarakat Orang Asli/Asal sejak penubuhannya.

Justeru, SUHAKAM melihat pentingnya penglibatan semua pihak berkepentingan bagi memastikan keberkesanan Inkuiri ini. Inisiatif pertama SUHAKAM adalah untuk memaklumkan pihak Kerajaan Persekutuan dan Kerajaan Negeri yang berkaitan mengenai niat dan objektif inkuiri ini. Ini diikuti pula oleh sesi konsultasi dimana pihak berkepentingan yang lain termasuk masyarakat Orang Asal/Asli dan masyarakat madani (civil society) diberi peluang untuk mengemukakan isu-isu berkaitan. Turut hadir semasa sesi konsultasi ini adalah wakil-wakil Kerajaan Persekutuan dan Negeri. Bagi memastikan SUHAKAM mendapat gambaran menyeluruh dan adil mengenai isu-isu yang dibangkitkan semasa sesi konsultasi, SUHAKAM telah menjalankan sesi pendengaran awam dimana kes-kes yang dipilih berdasarkan kriteria tertentu telah didengar. Semasa sesi pendengaran awam ini, semua pihak termasuk masyarakat Orang Asal/Asli, sektor swasta dan Kerajaan dijemput untuk memberikan keterangan di hadapan Panel Inkuiri. Keseluruhan proses Inkuiri Nasional ini memakan masa lebih 18 bulan dan peruntukan sebanyak RM1,235,508.61 telah dibelanjakan bagi menjayakan Inkuiri Nasional ini.

Hasil daripada proses Inkuiri Nasional ini, satu Laporan telah disediakan yang merangkumi isu-isu yang telah dibangkitkan. Laporan ini telah dibahagikan kepada beberapa bab termasuk tiga bab berasingan bagi merekodkan isu-isu yang bagi Semenanjung Malaysia, Sabah dan Sarawak.

SUHAKAM ingin menarik perhatian kepada isu-isu am (*common*) yang melibatkan keseluruhan Orang Asal/Asli di Malaysia. Ini termasuklah dakwaan bahawa pihak bertanggungjawab gagal memberi pengiktirafan sebenar terhadap konsep pemilikan tanah mengikut adat turun-temurun Orang Asal/Asli dan kelemahan pentadbiran tanah Orang Asal/Asli oleh pihak Kerajaan. Selain itu, isu-isu lain yang dibangkitkan adalah melibatkan dakwaan kegiatan pembalakan dan perladangan dijalankan di atas tanah adat Orang Asal/Asli. Disamping itu, terdapat juga dakwaan tanah adat Orang Asal/Asli telah diwartakan sebagai kawasan perlindungan (rizab hutan simpan atau kawasan perlindungan hidupan liar). Isu yang kerap ditimbulkan adalah ketiadaan sesi konsultasi yang menyeluruh dan telus dengan Orang Asal/Asli mengenai pembangunan tanah adat di kawasan mereka.

Dalam Lapornya itu, SUHAKAM telah menyenaraikan 18 syor-syor berkaitan dengan enam isu utama seperti berikut:-

1. Pengiktirafan Hak Adat Orang Asal/Asli terhadap tanah
2. Remedi bagi tanah yang hilang
3. Menangani isu-isu / ketidakseimbangan pembangunan tanah
4. Mencegah kehilangan tanah adat Orang Asal/Asli di masa hadapan
5. Menangani isu-isu pentadbiran tanah
6. Mengiktiraf tanah sebagai nadi kepada identiti Orang Asal/Asli

SUHAKAM berharap agar Kerajaan dapat mengambil perhatian dan tindakan segera terhadap isu-isu yang diketengahkan oleh SUHAKAM dalam Laporan Inkuiri Nasional Mengenai Hak Tanah Adat Orang Asal/Asli ini. Antara syor-syor khusus atau spesifik yang diharapkan akan mendapat sokongan daripada pihak Kerajaan adalah berkaitan penubuhan satu Suruhanjaya Kebangsaan yang bebas mengenai Orang Asal yang fungsinya antara lain akan meneliti pengiktirafan secara berkesan serta mempromosi dan melindungi hak Orang Asal/Asli terhadap tanah dan identiti mereka. Penubuhan Suruhanjaya yang dicadangkan ini perlu dilihat sebagai satu tindakan afirmatif yang terikat dengan jangka masa tertentu dan melibatkan penyertaan meluas pihak-pihak berkepentingan bagi pembangunan dan kesejahteraan hidup Orang Asal/Asli di Malaysia.

SUHAKAM ingin mengambil kesempatan ini untuk mengucapkan terima kasih kepada semua yang terlibat terutamanya daripada wakil Kerajaan, masyarakat Orang Asal/Asli dan sektor swasta, atas kerjasama dan maklum balas dalam Inkuiri Nasional ini.

TAMAT

“HAK ASASI UNTUK SEMUA”

TAN SRI HASMY AGAM

Pengerusi

Suruhanjaya Hak Asasi Manusia Malaysia (SUHAKAM)

5 Ogos 2013